

Conoce bo matanan local: Beishi Baranca

Skirbi pa Roy Maduro

Beishi Baranca su nomber ta netamente pe. Tin poco mata cu nan number ta describinan asina bon. Cu mi sa ta riba e barancanan di calichi di pabou di e grotnan y e barancanan cerca di Boca Grandi so e mata aki ta crece... ah, un excepcion: mi Hortus Fantastica, pero tambe riba baranca... Su nomber cientifico ta: *Stenostomum acutatum*

E mata aki ta haci cabalmente su trabou di cubri e area implacabel aki, unda ta asina duro pa cualkier cos crece. Ora bo mir'e e ta ponebo corda un mata di *Ixora* enano cu su blachi fini y berde ta lombr. Ora bo mir'e di leu bo ta kere ta un manada di carne berde, pero semper berde, hasta den e segura mas implacabel. E unico luga cu mi a miranan otro color tabata tempo nan tabata kibra piedra y tur e stof blanco tabata cubri nan. Mi a sinta pensa, ki dolor e matanan ta pasa aden, cubri cu stof, wardando



Tereno amplio cu Beishi di Baranca creciendo den sabana.

un stof di awa cay pa limpia nan blachinan. Poco mi tabata sa cu despues di un par di aña Parke Nacional Arikok a logra para e garnadonan di piedra pa salba e pida naturalesa ey. E beishi baranca tin un troshi flor chikito cu despues ta bira un troshi bei-

shi biña di como 3-4 mm, tirando pa preto. Den memey e tin un pipita duro. Un cuminda faborito pa parha, y eynan e peliger ta sinta pa e pover parhanan. Cascabel y awor Boa ta sinta sconde pa gara cualkier parha cu pasa cerca. Pero no desespera ni spanta,

no ta tur beishi baranca tin un colebra bou dje.

Pa mira e beishi baranca, bay cana e ruta nobo den Parke Nacional, patras di Jamanota. Lo bo reconocenan mesora.

Pa mas informacion por e-mail Roy na floreceuroy@yahoo.com of tambe via www.fantasticgardensaruba.com. ☐



Beishi di Baranca.